

開放文學 – 歷代筆記 – 世說新語  
輕詆第二〇六

1 王太尉問眉子：「汝叔名士，何以不相推重？」眉子曰：「何有名士終日妄語？」 2 庾元規語周伯仁：「諸人皆以君方樂。」周曰：「何樂？謂樂毅邪？」庾曰：「不爾，樂令耳。」周曰：「何乃刻畫無鹽，以唐突西子也。」

3 深公云：「人謂庾元規名士，胸中柴棘三斗許。」

4 庾公權重，足傾王公。庾在石頭，王在冶城坐；大風揚塵，王以扇拂之曰：「元規塵汚人！」

5 王右軍少時甚澀訥。在大將軍許、王、庾二公後來，右軍便起欲去，大將軍留之，曰：「爾家司空、元規，復何所難？」

6 王丞相輕蔡公，曰：「我與安期、千里共游洛水邊，何處聞有一蔡克兒？」

7 褚太傅初渡江，嘗入東，至金昌亭；吳中豪右，燕集亭中。褚公雖素有重名，於時造次不相識別。敕左右多與茗汁，少著粽，汁盡即益，使終不得食。褚公飲訖，徐舉手共語云：「褚季野！」於是四坐驚散，無不狼狽。

8 王右軍在南，丞相與書，每歎子姪不令，云：「虎狔、虎犢，還其所如。」

9 褚太傅南下，孫長樂於船中視之；言次，及劉真長死，孫流涕，因諷詠曰：「人之云亡，邦國殄瘁！」褚大怒，曰：「真長平生，何嘗相比數？而卿今日作此面向人！」孫回泣向褚曰：「卿當念我！」時咸笑其才而性鄙。

10 謝鎮西書與殷揚州，為真長求會稽；殷答曰：「真長標同伐異，俠之大者。常謂使君降階為甚，乃復為之驅馳邪？」

11 桓公入洛，過淮、泗，踐北境，與諸僚屬登平乘樓，眺矚中原，慨然曰：「遂使神州陸沈，百年丘墟，王夷甫諸人，不得不任其責！」袁虎率爾對曰：「運自有廢興，豈必諸人之過？」桓公凜然作色，顧謂四坐曰：「諸君頗聞劉景升不？有大牛重千斤，啖芻豆倍於常牛；負重致遠，曾不若一羸犛。魏武入荊州，烹以饗士卒，於時莫不稱快。」意以況袁。四坐既駭，袁亦失色。

12 袁虎、伏滔同在桓公府，桓公每游燕，輒命袁、伏。袁甚恥之，恒歎曰：「公之厚意，未足以榮國士，與伏滔比肩，亦何辱如之？」

13 高柔在東，甚為謝仁祖所重。既出，不為王、劉所知。仁祖曰：「近見高柔，大自敷奏，然未有所得。」真長云：「故不可在偏地居，輕在角觴中，為人作議論。」高柔聞之，云：「我就伊無所求。」人有向真長學此言者，真長曰：「我實亦無可與伊者。」然游燕猶與諸人書：「可要安固。」安固者，高柔也。

14 劉尹、江彪、王叔虎、孫興公同坐，江、王有相輕色；彪以手歛叔虎云：「酷吏！」詞色甚彊。劉尹顧謂：「此是瞋邪？非特是醜言聲，拙視瞻。」

15 孫綽作《列仙商丘子贊》曰：「所牧何物？殆非真豬。儻遇風雲，為我龍摠。」時人多以為能。王藍田語人云：「近見孫家兒作文，道『何物』、『真豬』也。」

16 桓公欲遷都，以張拓定之業。孫長樂上表，諫此議，甚有理。桓見表心服，而忿其為異。令人致意孫云：「君何不尋《遂初賦》，而彊知人家國事？」

17 孫長樂兄弟就謝公宿，言至款雜。劉夫人在壁後聽之，具聞其語。謝公明日還，問昨客何似，劉對曰：「亡兄門，未有如此賓客！」謝深有愧色。

18 簡文與許玄度共語，許云：「舉君、親以為難。」簡文便不復答，許去後而言曰：「玄度故可不至於此！」

19 謝萬壽春敗後，還，書與王右軍云：「慚負宿願。」右軍推書曰：「此禹、湯之戒。」

20 蔡伯喈暗昧笛椽，孫興公聽妓，振且擺折。王右軍聞，大嗔曰：「三祖壽樂器，虺瓦弔，孫家兒打折。」

21 王中郎與林公絕不相得。王謂林公詭辯，林公道王云：「箬膩顏恰，縵布單衣，挾左傳，逐鄭康成車後，問是何物塵垢囊！」

22 孫長樂作《王長史誄》云：「余與夫子，交非勢利，心猶澄水，同此玄味。」王孝伯見曰：「才士不遜，亡祖何至與此人周旋？」

23 謝太傅謂子姪曰：「中郎始是獨有千載！」車騎曰：「中郎衿抱未虛，復那得獨有？」

24 庾道季詫謝公曰：「裴郎云：『謝安謂裴郎，乃可不惡，何得為復飲酒？』裴郎又云：『謝安目支道林；如九方臯之相馬，略其玄黃，取其雋逸。』」謝公云：「都無此二語，裴自為此辭耳！」庾意甚不以為好，因陳東亭《經酒壚下賦》；讀畢，都不下賞裁，直云：「君乃復作裴氏學！」於此《語林》遂廢。今時有者，皆是先寫，無復謝語。

25 王北中郎不為林公所知，乃著《沙門不得為高士論》，大略云：高士必在於縱心調暢，沙門雖云俗外，反更束於教，非情性自得之謂也。

26 人問顧長康：「何以不作洛生詠？」答曰：「何至作老婢聲！」

27 殷覬、庾恒並是謝鎮西外孫。殷少而率悟，庾每不推。嘗俱詣謝公，謝公熟視殷，曰：「阿巢故似鎮西。」於是庾下聲語曰：「定何似？」謝公續復云：「巢類似鎮西。」庾復云：「類似，足作健不？」

28 舊目韓康伯：將肘無風骨。

29 苻宏叛來歸國，謝太傅每加接引。宏自以有才，多好上人，坐上無折之者。適王子猷來，太傅使共語。子猷直孰視良久，回語太傅云：「亦復竟不異人。」宏大慚而退。

30 支道林入東，見王子猷兄弟，還，人問：「見諸王何如？」答曰：「見一群白頸烏，但聞喚啞啞聲。」

31 王中郎舉許玄度為吏部郎，郝重熙曰：「相王好事，不可使阿訥在坐。」

32 王興道謂：謝望蔡霍霍如失鷹師。

33 桓南郡每見人不快，輒嗔云：「君得哀家梨，當復蒸食不？」